



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ
ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁ

ք. Երևան

18.10.2018թ.

Ո Ր Ո Շ ՈՒ Մ

ՀՀ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁԻ

թիվ ԳԲԽ-ԷՍ-2018/100

ՀՀ գնումների հետ կապված բողոքներ քննող անձը (այսուհետ՝ նաև Բողոքներ քննող անձ)՝ քննելով «Վ ԵՎ Ա» ՍՊԸ-ի կողմից 27.09.2018թ. ներկայացրած բողոքը (այսուհետ՝ նաև Բողոք) և կից փաստաթղթերը, պարզեց հետևյալը.

1. «Վ ԵՎ Ա» ՍՊԸ-ի ներկայացրած փաստերը, հիմնավորումները և պահանջը.

«Վ ԵՎ Ա» ՍՊԸ-ն 27.09.2018թ. ներկայացրած բողոքով հայտնել է հետևյալը.

«Երևանի քաղաքապետարանի (այսուհետ նաև՝ Պատվիրատու) կողմից Երևան քաղաքի Նոր Նորք վարչական շրջանի թիվ 117 մանկապարտեզի ջեռուցման համակարգի կառուցման աշխատանքի կատարման նպատակով հայտարարվել է ԵԲ-ԳՀԱՇՁԲ-18/49 ծածկագրով գնման ընթացակարգ (այսուհետ նաև՝ Ընթացակարգ):

Ընթացակարգին մասնակցելու նպատակով ի թիվս այլ կազմակերպությունների 13.09.2018թ. հայտ է ներկայացրել նաև «Վ ԵՎ Ա» ՍՊԸ-ն (այսուհետ նաև Ընկերություն):

«Վ ԵՎ Ա» ՍՊԸ-ի կողմից պայմանագրի կատարման համար նախատեսված ընդհանուր գինը կազմում է 21.600.000 ՀՀ դրամ, որի 1 տոկոսը հավասար է 216.000 ՀՀ դրամի:

Ընթացակարգի գնահատող հանձնաժողովի (այսուհետ նաև՝ Հանձնաժողով)

13.09.2018թ. ժամը 11:00-ին կայացած նիստի թիվ 2 արձանագրության 1.6 կետի համաձայն՝ 1-ին տեղ զբաղեցնող մասնակից է ճանաչվել «Վ ԵՎ Ա» ՍՊԸ-ն:

Նույն արձանագրության 1.7 կետի համաձայն՝ Հանձնաժողովը որոշել է առաջին տեղ զբաղեցրած մասնակիցների մասով հարցում ներկայացնել Հայաստանի Հանրապետության կառավարությանն առընթեր պետական եկամուտների կոմիտեի (այսուհետ նաև՝ Կոմիտե) պարզելու ՀՀ պետական բյուջեի նկատմամբ հայտը ներկայացնելու օրվա դրությամբ ժամկետանց հարկային պարտավորություններ ունենալու կամ չունենալու վերաբերյալ:

Ընթացակարգի գնահատող հանձնաժողովի 20.09.2018թ. ժամը 11:00-ին կայացած նիստի թիվ 3 արձանագրության 1.1 կետի համաձայն՝ հիմք ընդունելով Հայաստանի Հանրապետության կառավարությանն առընթեր պետական եկամուտների կոմիտեի կողմից տրված եզրակացությունը, «Վ ԵՎ Ա» ՍՊԸ-ի կողմից ներկայացված հայտարարությունը համարվել է իրականությանը չհամապատասխանող:

Նույն արձանագրության 1.4 կետի համաձայն՝ Հանձնաժողովը հիմք ընդունելով այն հանգամանքը, որ առաջին տեղ զբաղեցրած մասնակից՝ «Վ ԵՎ Ա» ՍՊԸ-ն հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունի ժամկետանց պարտավորություններ 53.370 ՀՀ դրամի չափով, և ղեկավարվելով Կարգի 32-րդ կետի 20-րդ ենթակետով, 44-րդ կետով և հրավերի 7.15 կետով, որոշել է մերժել «Վ ԵՎ Ա» ՍՊԸ-ի հայտը և հրավերով սահմանված փաստաթղթեր ներկայացնելու պահանջ ներկայացնել հաջորդաբար տեղ զբաղեցրած մասնակցին:

Ընկերությունը համաձայն չէ վերը նշված որոշման և Կոմիտեի եզրակացության հետ, քանի որ Հայաստանի Հանրապետության կառավարությանն առընթեր պետական եկամուտների կոմիտեի նախագահի 2018թ. ապրիլի 11-ի թիվ 245-Ա հրամանով սահմանված հավելվածի՝ հարկ վճարողի անձնական հաշվի քարտի 13.09.2018թ. (հայտը ներկայացնելու օրվա) դրությամբ «Վ ԵՎ Ա» ՍՊԸ-ի հարկային մարմնի կողմից վերահսկվող եկամուտների գծով պարտավորությունների, դեբետային գումարների, սահմանված չափից ավել վճարված գումարների, միասնական հաշվում առկա գումարների, հարկային մարմնի տեղեկատվական բազայում առկա տեղեկությունների հիման վրա պաշտոնական քաղվածքի (այսուհետ նաև՝ Քաղվածք) համաձայն՝ Ընկերությունը ունի 31.383 ՀՀ դրամի հարկային պարտավորություններ:

Ընկերությունը հիմք ընդունելով վերոնշյալ պաշտոնական քաղվածքից վերցված տվյալները և համոզված լինելով, որ «Վ ԵՎ Ա» ՍՊԸ-ի հարկային պարտավորությունների

չափը չի գերազանցում Օրենքի 6-րդ հոդվածի 1-ին մասի 2-րդ կետով նախատեսված շեմը, հայտ է ներկայացրել և մասնակցել է Ընթացակարգին:

Սակայն, ի զարմանս Ընկերության, պարզվել է, որ «Վ ԵՎ Ա» ՍՊԸ-ն հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունի ոչ թե 31.383 ՀՀ դրամի, այլ 53.370 ՀՀ դրամի չափով ժամկետանց պարտավորություններ:

Վերոհիշյալ խնդիրը պարզելու նպատակով, Ընկերությունը դիմել է Կոմիտե և խնդրել է տալ տեղեկատվություն 13.09.2018թ. (հայտը ներկայացնելու օրվա) դրությամբ հարկային մարմնի կողմից վերահսկվող եկամուտների գծով պարտավորությունների վերաբերյալ:

Ի պատասխան Ընկերության հարցմանը, Կոմիտեի կողմից 26.09.2018թ. տրված թիվ 2702 տեղեկանքի համաձայն՝ «Վ ԵՎ Ա» ՍՊԸ-ն 13.09.2018թ. դրությամբ ունի 31.383 ՀՀ դրամի հարկային պարտավորություն և 22.000 ՀՀ դրամի դրոշմանիշային վճար:

Ցանկանում ենք նշել, որ դրոշմանիշային վճարի մասով Քաղվածքի մեջ որևէ նշում չկար և Ընկերությունը չէր կարող տեղեկանար կամ կանխատեսեր, որ դրոշմանիշային վճարը հանդիսանում է հարկային մարմնի կողմից վերահսկվող եկամուտ, քանի որ 2018թ. ընթացքում մասնակցելով բազմաթիվ մրցույթների նման խնդիր Ընկերության մոտ չի առաջացել: Եթե դրոշմային վճարը համարվում է հարկային մարմնի կողմից վերահսկվող եկամուտների գծով պարտավորություն, ապա այս պարագայում ստացվում է, որ Ընկերությունը 2018թ. ընթացքում պետք է ունենար այդ պարտավորությունը և այն պետք է արտացոլված լիներ թե քաղվածքի, թե Կոմիտեի կողմից տրված եզրակացություններ մեջ, սակայն մինչև այս մրցույթը նման խնդիր չի առաջացել: Իսկ եթե Կոմիտեի կողմից կատարվել է նման փոփոխություն, ապա այս պարագայում առնվազն առկա է իրազեկման խնդիր, որպեսզի մրցույթի մասնակիցները տեղեկացված լինեին և կատարեին համապատասխան վճարումները:

Ցանկանում ենք նաև նշել, որ «Վ ԵՎ Ա» ՍՊԸ-ի կողմից պայմանագրի կատարման համար նախատեսված ընդհանուր գինը կազմում է 21.600.000 ՀՀ դրամ, իսկ 2-րդ տեղ զբաղեցնող մասնակցի՝ «Նիկ Դավ Գրուպ» ԲԲԸ-ի ընդհանուր գինը կազմում է 24.333.600 ՀՀ դրամ, շուրջ 2.733.600 ՀՀ դրամ ավելին:

Այսինքն, տվյալ պարագայում Ընկերության հայտը մերժելով, ՀՀ պետական բյուջեն կարող է կրել շուրջ 2.733.600 ՀՀ դրամի վնաս:

«Գնումների մասին» ՀՀ օրենքի (այսուհետ նաև՝ Օրենք) Օրենքի 6-րդ հոդվածի 1-ին մասի 2-րդ կետի համաձայն՝ գնումների ընթացակարգերին մասնակցելու իրավունք չունեն

այն անձինք՝ որոնք հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեն իրենց ներկայացրած գնային առաջարկի մինչև մեկ տոկոսը, բայց ոչ ավելի, քան հիսուն հազար Հայաստանի Հանրապետության դրամը գերազանցող ժամկետանց պարտավորություններ:

ՀՀ կառավարության 04.05.2017թ. թիվ 526-Ն որոշմամբ հաստատված գնումների գործընթացի կազմակերպման կարգի (այսուհետ նաև՝ կարգ) 32-րդ կետի 1-ին ենթակետի համաձայն՝ հրավերով նախատեսվում է նաև, որ մասնակիցը հայտով ներկայացնում է իր կողմից հաստատված հայտարարություն՝ հրավերով սահմանված մասնակցության իրավունքի և որակավորման չափանիշներին իր համապատասխանության մասին:

Կարգի 43-րդ կետի 3-րդ ենթակետի համաձայն՝ հայտերի բացման նիստի ավարտին հաջորդող աշխատանքային օրը հանձնաժողովի քարտուղարը՝ էլեկտրոնային փոստի միջոցով Հայաստանի Հանրապետության կառավարությանն առընթեր պետական եկամուտների կոմիտե հարցում է ներկայացնում առաջին տեղն զբաղեցրած մասնակցի՝ հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ժամկետանց պարտավորությունների, ինչպես նաև հրավերով «ֆինանսական միջոցներ» որակավորման չափանիշի գնահատման համար սահմանված պայմանների առկայության վերաբերյալ՝ ներկայացնելով մասնակցի անվանումը և հարկ վճարողի հաշվառման համարը:

Կարգի 44-րդ կետի համաձայն՝ կոմիտեն սույն կարգի 43-րդ կետի 3-րդ ենթակետով նախատեսված հարցումն ստանալու օրվանից երեք աշխատանքային օրվա ընթացքում էլեկտրոնային փոստի միջոցով տրամադրում է հարցման մասին տեղեկատվություն: Սույն կետով սահմանված ժամկետում կոմիտեից տեղեկատվության չստացման դեպքում մասնակցի ներկայացրած հայտարարությունները համարվում են իրականությանը համապատասխանող: Եթե կոմիտեի կողմից սահմանված ժամկետից ուշ ներկայացված տեղեկատվությամբ արձանագրվում է, որ առաջին տեղն զբաղեցրած մասնակիցը հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեցել է օրենքով նախատեսված շեմը գերազանցող ժամկետանց պարտավորություններ կամ չի բավարարում հրավերով «ֆինանսական միջոցներ» որակավորման չափանիշի պահանջները, և պայմանագիրը կնքված չէ, ապա տվյալ մասնակցի հայտը մերժվում է: Եթե սահմանված ժամկետում տրամադրված տեղեկատվության արդյունքում մասնակցի ներկայացրած հայտարարությունը որակվում է իրականությանը չհամապատասխանող, ապա հայտերի գնահատման նիստում հանձնաժողովի որոշմամբ տվյալ մասնակցի հայտը

մերժվում է՝ անկախ մասնակցի կողմից կոմիտեի տրամադրած տեղեկատվությունից տարբերվող տեղեկատվություն ներկայացվելու հանգամանքից: Սույն կետով նախատեսված որակավորման չափանիշի գնահատման ժամանակ հաշվի է առնվում սույն կարգի 47-րդ կետով նախատեսված ընթացակարգը:

Կարգի 45-րդ կետի համաձայն՝ Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում պատվիրատուն տվյալ մասնակցի տվյալները՝ համապատասխան հիմքերով, գրավոր ուղարկում է լիազորված մարմին, որը դրանք ստանալուն հաջորդող 5 աշխատանքային օրվա ընթացքում գրավոր տրամադրում է գնումների բողոքարկման խորհրդին: Սույն կարգի 44-րդ կետով սահմանված՝ մասնակցության իրավունք չունենալու հիմքերի առկայության դեպքում սույն կետով նախատեսված տվյալները չեն ներկայացվում լիազորված մարմին, եթե մասնակիցը կամ կոմիտեն լրացուցիչ տեղեկատվությունը ներկայացրել է մինչև հայտերի գնահատման արդյունքների հաստատման նիստին հաջորդող երրորդ աշխատանքային օրը: Լրացուցիչ տեղեկատվությունը ներկայացվում է ինչպես առաջին տեղը զբաղեցրած մասնակցի կողմից՝ կոմիտեից ստացված գրավոր տեղեկատվությունը գնահատող հանձնաժողովին ներկայացմամբ, այնպես էլ կոմիտեի կողմից տրված նոր տեղեկատվությամբ: Ընդ որում, գնահատող հանձնաժողովի կամ քարտուղարի կողմից կոմիտեին կրկնակի հարցում չի կատարվում:

Օրենքի 46-րդ հոդվածի 1-ին մասի համաձայն՝ յուրաքանչյուր անձ իրավունք ունի բողոքարկելու պատվիրատուի, գնահատող հանձնաժողովի և գնումների բողոքարկման խորհրդի գործողությունները (անգործությունը) և որոշումները:

Նույն հոդվածի 3-րդ մասի համաձայն՝ յուրաքանչյուր անձ իրավունք ունի սույն օրենքի համաձայն նախքան պայմանագրի կնքումը բողոքարկելու պատվիրատուի և գնահատող հանձնաժողովի գործողությունները (անգործությունը) և որոշումները գնումների բողոքարկման խորհրդին:

Օրենքի 50-րդ հոդվածի 2-րդ մասի 1-ին կետի համաձայն՝ եթե բողոքը ներկայացրած անձը բողոքարկում է պայմանագրի կնքելու որոշումը, ապա բողոքը ներկայացվում է սույն օրենքի 10-րդ հոդվածով նախատեսված անգործության ժամանակահատվածում:

Օրենքի 50-րդ հոդվածի 7-րդ մասի 1-ին կետի համաձայն՝ խորհուրդը իրավունք ունի պատվիրատուի և գնահատող հանձնաժողովի գործողությունների կամ անգործության վերաբերյալ ընդունելու հետևյալ որոշումները.

ա. արգելելու կատարել որոշակի գործողություններ և ընդունել որոշումներ,

բ. պարտավորեցնելու ընդունել համապատասխան որոշումներ, ներառյալ՝ չկայացած հայտարարելու գնման ընթացակարգը, բացառությամբ պայմանագիրը անվավեր ճանաչելու մասին որոշման,

Նույն հոդվածի 9-րդ մասի համաձայն՝ բողոքի քննությունը բաց է հանրության համար, բացառությամբ պետական գաղտնիք պարունակող գնումների: Բողոքն ստանալու օրվանից հաշված՝ մեկ աշխատանքային օրվա ընթացքում, այդ մասին խորհուրդը հայտարարություն է հրապարակում տեղեկագրում:

Օրենքի 51-րդ հոդվածի 1-ին մասի համաձայն՝ Գնումների բողոքարկման խորհուրդ ներկայացված բողոքն ինքնաբերաբար կասեցնում է գնման գործընթացը՝ սույն օրենքի 50-րդ հոդվածի 9-րդ մասով նախատեսված հայտարարությունը հրապարակվելու օրվանից մինչև բողոքարկման վերաբերյալ ընդունված որոշման՝ տեղեկագրում հրապարակման օրը ներառյալ:

Այսպիսով, գտնում ենք, որ «Վ ԵՎ Ա» ՍՊԸ-ն բավարարել է Օրենքի 6-րդ հոդվածի 1-ին մասի 2-րդ կետով սահմանված պահանջներին, քանի որ տվյալ դեպքում, Ընկերությունը թիվ ԵԲ-ԳՀԱՇՁԲ-18/49 ծածկագրով ընթացակարգի արդյունքում՝ նվազագույն գնային առաջարկ ներկայացնելու պայմաններում ճանաչվել է առաջին տեղ զբաղեցնող մասնակից, սակայն Կոմիտեի կողմից տրված եզրակացության պատճառով զրկվել է պայմանագիր կնքելու հնարավորությունից, դրանով իսկ մեկուսացվելով պայմանագրի կողմ հանդիսանալուց:

Գտնում ենք, որ Ընկերությունը հայտը ներկայացնելու օրվա դրությամբ ՀՀ պետական բյուջեի նկատմամբ ժամկետանց հարկային պարտավորություններ իրականում չի ունեցել, քանի որ, ինչպես արդեն նշվել է Ընկերությունը հիմք ընդունելով պաշտոնական Քաղվածքից վերցված տվյալները և համոզված լինելով, որ «Վ ԵՎ Ա» ՍՊԸ-ի հարկային պարտավորությունների չափը չի գերազանցում Օրենքի 6-րդ հոդվածի 1-ին մասի 2-րդ կետով նախատեսված շեմը, հայտ է ներկայացրել և մասնակցել է Ընթացակարգին, տեղեկացված կամ իրազեկված չլինելով, որ Կոմիտեն դրոշմանիշային վճարները այսուհետ դիտարկվում է որպես հարկային մարմնի կողմից վերահսկվող եկամուտ և այդ պարտավորությունները չկատարելը կարող է դիտարկվել որպես ժամկետանց հարկային պարտավորություն, ինչն էլ հիմք է հանդիսացել Ընկերության հայտը մերժելուն:

Ի լրումն «Վ ԵՎ Ա» ՍՊԸ-ի 27.09.2018թ. ներկայացված բողոքի, Ընկերությունը 18.10.2018թ. գրավոր դիրքորոշմամբ հայտնել է, որ ներկայացված բողոքի մեջ տեղի է ունեցել տեխնիկական վրիպակ, Ընկերությունը հայտը ներկայացրել է ոչ թե 13.09.2018թ. այլ 12.09.2018թ.: 12.09.2018թ. դրությամբ Ընկերության «Հարկ վճարողի անձնական հաշվի

քարտի» քաղվածքի համաձայն՝ Ընկերությունը ունի 31.369 ՀՀ դրամի հարկային պարտավորություններ:

«Վ ԵՎ Ա» ՍՊԸ-ի կողմից պայմանագրի կատարման համար նախատեսված ընդհանուր գինը կազմում է 21.600.000 ՀՀ դրամ, որի 1 տոկոսը հավասար է 216.000 ՀՀ դրամի:

Ընկերությունը հիմք ընդունելով Ընկերության «Հարկ վճարողի անձնական հաշվի քարտի» քաղվածքը և համոզված լինելով, որ հարկային պարտավորությունների չափը չի գերազանցում Օրենքի 6-րդ հոդվածի 1-ին մասի 2-րդ կետով նախատեսված շեմը, հայտ է ներկայացրել և մասնակցել է Ընթացակարգին:

«Վ ԵՎ Ա» ՍՊԸ-ն հայտը ներկայացնելու օրվա դրությամբ առաջնորդվել է Ընկերության «Հարկ վճարողի անձնական հաշվի քարտի» տվյալների առկա տեղեկատվությամբ, որի համաձայն՝ 12.09.2018թ. դրությամբ «Վ ԵՎ Ա» ՍՊԸ-ն հարկային մարմնի կողմից վերահսկվող եկամուտների գծով չի ունեցել գնումների մասին ՀՀ օրենսդրությամբ նախատեսված շեմը գերազանցող պարտավորություն:

«Վ ԵՎ Ա» ՍՊԸ-ն բողոքներ քննող անձին ներկայացված բողոքով խնդրել է պարտավորեցնել Երևանի քաղաքապետարանի կողմից Երևան քաղաքի Նոր Նորք վարչական շրջանի թիվ 117 մանկապարտեզի ջեռուցման համակարգի կառուցման աշխատանքի կատարման նպատակով հայտարարված գնման ընթացակարգի գնհատող հանձնաժողովին դադարեցնել 20.09.2018թ. ժամը 11:00-ին կայացած նիստի թիվ 3 արձանագրության 1.1 կետով և 1.4 կետով ԵԲ-ԳՀԱՇՁԲ-18/49 ծածկագրով կայացված որոշումները, և նույն որոշումներից հետո կայացված այլ որոշումները:»:

Բողոքներ քննող անձի կողմից հրավիրված նիստերին մասնակցում էր «Վ ԵՎ Ա» ՍՊԸ-ի կոմից լիազորված ներկայացուցիչ Ռաֆայել Մկրտչյանը:

2. Երևանի քաղաքապետարանի կողմից բողոքի վերաբերյալ ներկայացված փաստերը, հիմնավորումները և դիրքորոշումը.

Ղեկավարվելով «Գնումների մասին» ՀՀ օրենքի 50-րդ հոդվածի 4-րդ մասով՝ բողոքի վերաբերյալ որոշում կայացնելու նպատակով Բողոքներ քննող անձը դիմել է Երևանի քաղաքապետարանին, խնդրելով՝ նույն հոդվածով սահմանված ժամկետում Բողոքներ քննող անձին տրամադրել գրավոր դիրքորոշում, ինչպես նաև բոլոր անհրաժեշտ փաստաթղթերի պատճենները, սակայն վերջինիս կողմից որևէ դիրքորոշում չի ներկայացվել:

Երևանի քաղաքապետարանը պատշաճ ծանուցվել է Բողոքներ քննող անձի կողմից հրավիրված նիստերի ժամանակացույցի վերաբերյալ, սակայն քաղաքապետարանի կողմից լիազորված որևէ ներկայացուցիչ չի ներկայացել:

3. ԳԲԽ-ԷՍ-2018/100 բողոքի քննության համար էական նշանակություն ունեցող փաստերը, Բողոքներ քննող անձի հիմնավորումները և եզրահանգումը.

Բողոքներ քննող անձն ուսումնասիրել է «Վ ԵՎ Ա» ՍՊԸ-ի կողմից 27.09.2018թ ներկայացրած բողոքը և կից փաստաթղթերը, ԵԲ-ԳՀԱՇՁԲ-18/49 ծածկագրով ծածկագրով գնանշման հարցման հրավերը (այսուհետ՝ նաև Հրավեր), ԵԲ-ԳՀԱՇՁԲ-18/49 ծածկագրով գնանշման հարցման գնահատող հանձնաժողովի (այսուհետ՝ նաև Հանձնաժողով) 13.09.2018թ. ժամը 11:00-ին կայացած նիստի թիվ 2 և 20.09.2018թ. ժամը 11:00-ին կայացած նիստի թիվ 3 արձանագրությունները, 12.09.2018թ. դրությամբ Ընկերության «Հարկ վճարողի անձնական հաշվի քարտի» քաղվածքը, ՀՀ ԿԱ պետական եկամուտների կոմիտեի կողմից 26.09.2018թ. «Վ ԵՎ Ա» ՍՊԸ-ին տրված թիվ 2702 տեղեկանք, ՀՀ ԿԱ պետական եկամուտների կոմիտեի կողմից 17.09.2018թ. տրված եզրակացությունը.

Երևանի քաղաքապետարանի կարիքների համար Երևան քաղաքի Նոր Նորք վարչական շրջանի թիվ 117 մանկապարտեզի ջեռուցման համակարգի կառուցման աշխատանքի ձեռքբերման նպատակով հայտարարվել է ԵԲ-ԳՀԱՇՁԲ-18/49 ծածկագրով գնանշման հարցում (այսուհետ՝ նաև Ընթացակարգ), որին մասնակցության հայտ է ներկայացրել նաև «Վ ԵՎ Ա» ՍՊԸ-ն:

Ընկերությունը ընթացակարգին մասնակցելու նպատակով ներկայացված հայտի N2 հավելվածով՝ ընթացակարգին մասնակցելու նպատակով հրավերով սահմանված մասնակցության իրավունքի պահանջներին համապատասխանելու մասին հայտարարությամբ, հայտարարել և հավաստել է, որ բավարարում է ԵԲ-ԳՀԱՇՁԲ-18/49 ծածկագրով գնանշման հարցման հրավերով սահմանված մասնակցության իրավունքի պահանջներին:

Հանձնաժողովը 13.09.2018թ. ժամը 11:00-ին կայացած նիստի թիվ 2 արձանագրության 1-ին կետի՝

- 1.6 ենթակետով որոշել է Ընթացակարգի առաջին տեղ զբաղեցրած ճանաչել «Վ ԵՎ Ա» ՍՊԸ-ին:

- 1.7 ենթակետով որոշել է «Գնումների գործընթացի կազմակերպման» կարգի՝ 43-րդ կետի 3-րդ ենթակետի համաձայն՝ ՀՀ ԿԱ պետական եկամուտների կոմիտե հարցում ներկայացնել առաջին տեղ զբաղեցրած մասնակցի՝ հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ժամկետանց պարտավորությունների առկայության, ինչպես նաև Հրավերով «ֆինանսական միջոցներ» որակավորման չափանիշի գնահատման համար սահմանված պայմանների առկայության վերաբերյալ:

- ՀՀ ԿԱ պետական եկամուտների կոմիտեի կողմից 17.09.2018թ. տրամադրած եզրակացության համաձայն՝ «Վ ԵՎ Ա» ՍՊԸ-ն հարկային մարմնի կողմից վերահսկվող եկամուտների գծով ունի ժամկետանց պարտավորություններ՝ 53.370 ՀՀ դրամ գումարի չափով:

Հանձնաժողովը 20.09.2018թ. ժամը 11:00-ին կայացած նիստի թիվ 3 արձանագրության 1-ին կետի՝

- 1.1 ենթակետով արձանագրել է, որ ՀՀ ԿԱ պետական եկամուտների կոմիտեի կողմից ստացված եզրակացության համաձայն, «Վ ԵՎ Ա» ՍՊԸ-ն հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունի ժամկետանց պարտավորություններ:

- 1.4 ենթակետով հիմք ընդունելով այն հանգամանքը, որ առաջին տեղ զբաղեցրած մասնակցի՝ «Վ ԵՎ Ա» ՍՊԸ-ն, հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունի ժամկետանց պարտավորություններ 53.370 ՀՀ դրամի չափով և ղեկավարվելով ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի՝ 32-րդ կետի 20-րդ ենթակետով, 44-րդ կետով և Հրավերի 7.15 կետով, որոշել է մերժել «Վ ԵՎ Ա» ՍՊԸ-ի հայտը:

Բողոքի քննության նպատակով կայացած նիստի ժամանակ «Վ ԵՎ Ա» ՍՊԸ-ի ներկայացուցիչը Բողոքներ քննող անձին հայտնեց, որ ԵԲ-ԳՀԱՇՁԲ-18/49 ծածկագրով գնանշման հարցման գնահատող հանձնաժողովը արձանագրել է, որ Ընկերությունը հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունի ժամկետանց պարտավորություններ՝ 53.370 ՀՀ դրամի չափով: Վերոհիշյալ խնդիրը պարզելու նպատակով, Ընկերությունը դիմել է ՀՀ ԿԱ պետական եկամուտների կոմիտե և խնդրել է տրամադրել տեղեկատվություն հարկային մարմնի կողմից վերահսկվող եկամուտների գծով պարտավորությունների վերաբերյալ: Ի պատասխան Ընկերության

հարցմանը, ՀՀ ԿԱ պետական եկամուտների կոմիտեի կողմից 26.09.2018թ. տրված թիվ 2702 տեղեկանքի համաձայն՝ «Վ ԵՎ Ա» ՍՊԸ-ն 13.09.2018թ. դրությամբ ունի 31.383 ՀՀ դրամի հարկային պարտավորություն և 22.000 ՀՀ դրամի դրոշմանիշային վճար: Մինչդեռ Ընկերության՝ «Հարկ վճարողի անձնական հաշվի քարտի» քաղվածքի համաձայն՝ հայտը ներկայացնելու օրվա դրությամբ 12.09.2018թ. հարկային մարմինների կողմից վերահսկվող եկամուտների գծով պարտավորությունների գումարը կազմել է 31.369 ՀՀ դրամ, որը չի գերազանցել գնումների մասին ՀՀ օրենսդրությամբ նախատեսված շեմը, իսկ դրոշմանիշային վճարի մասով որևէ նշում չկա, հետևաբար Ընկերությունը վստահ լինելով, որ հարկային մարմինների կողմից վերահսկվող եկամուտների գծով պարտավորություններ առկա չեն եղել, հայտ է ներկայացրել՝ առաջնորդվելով «Հարկ վճարողի անձնական հաշվի քարտի» տվյալների առկա տեղեկատվությամբ:

Միաժամանակ Ընկերության ներկայացուցիչը Բողոքներ քննող անձին ներկայացրեց «Հարկ վճարողի անձնական հաշվի քարտի» 12.09.2018թ. դրությամբ քաղվածքը, ինչպես նաև ՀՀ ԿԱ պետական եկամուտների կոմիտեի կողմից 26.09.2018թ. «Վ ԵՎ Ա» ՍՊԸ-ին տրված թիվ 2702 տեղեկանքը:

ՀՀ ԿԱ ՊԵԿ նախագահի 2017թ. հուլիսի 19-ի թիվ 228-Ն հրամանի համաձայն՝ սահմանված են վերհսկվող եկամուտների գծով պարտավորությունների հետևյալ հարկատեսակները՝ ԱԱՀ, շահութահարկ. եկամտային հարկ, ակցիզային հարկ, շրջանառության հարկ, արտոնագրային հարկ, բնապահպանական հարկ, ոչ ռեզիդենտի շահութահարկ, սոցիալական վճար, պետական տուրք, բնօգտագործման վճար, այլ հարկային եկամուտներ:

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի՝

- 32-րդ կետի 1-ին ենթակետի «բ» պարբերության համաձայն՝ մասնակիցը հայտով ներկայացնում է իր կողմից հաստատված հայտարարություն՝ հրավերով սահմանված մասնակցության իրավունքի և որակավորման չափանիշներին իր համապատասխանության մասին,

- 43-րդ կետի 3-րդ ենթակետի համաձայն՝ հայտերի բացման նիստի ավարտին հաջորդող աշխատանքային օրը հանձնաժողովի քարտուղարն էլեկտրոնային փոստի միջոցով Հայաստանի Հանրապետության կառավարությանն առընթեր պետական եկամուտների կոմիտե (այսուհետ՝ կոմիտե) հարցում է ներկայացնում առաջին տեղն զբաղեցրած մասնակցի՝ հայտը ներկայացնելու օրվա դրությամբ հարկային մարմնի

կողմից վերահսկվող եկամուտների գծով ժամկետանց պարտավորությունների, ինչպես նաև ինչպես նաև հրավերով «ֆինանսական միջոցներ» որակավորման չափանիշի գնահատման համար սահմանված պայմանների առկայության վերաբերյալ՝ ներկայացնելով մասնակցի անվանումը և հարկ վճարողի հաշվառման համարը.

- 44-րդ կետի համաձայն՝ կոմիտեն նույն կարգի 43-րդ կետի 3-ին ենթակետով նախատեսված հարցումն ստանալու օրվան հաջորդող երկու աշխատանքային օրվա ընթացքում էլեկտրոնային եղանակով պատվիրատուին տրամադրում է հարցման մասին տեղեկատվություն: Եթե կոմիտեի կողմից սահմանված ժամկետից ուշ ներկայացված տեղեկատվությամբ արձանագրվում է, որ առաջին տեղն զբաղեցրած մասնակիցը հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեցել է օրենքով նախատեսված շեմը գերազանցող ժամկետանց պարտավորություններ կամ չի բավարարում հրավերով «ֆինանսական միջոցներ» որակավորման չափանիշի պահանջները, և պայմանագիրը կնքված չէ, ապա տվյալ մասնակցի հայտը մերժվում է: Եթե սահմանված ժամկետում տրամադրված տեղեկատվության արդյունքում մասնակցի ներկայացրած հայտարարությունը որակվում է իրականությանը չհամապատասխանող, ապա հայտերի գնահատման նիստում հանձնաժողովի որոշմամբ տվյալ մասնակցի հայտը մերժվում է՝ անկախ մասնակցի կողմից կոմիտեի տրամադրած տեղեկատվությունից տարբերվող տեղեկատվություն ներկայացվելու հանգամանքից:

Երևանի քաղաքապետարանի կարիքների համար Երևան քաղաքի Նոր Նորք վարչական շրջանի թիվ 117 մանկապարտեզի ջեռուցման համակարգի կառուցման աշխատանքի ձեռքբերման նպատակով հայտարարված ԵԲ-ԳՀԱՇՁԲ-18/49 ծածկագրով գնանշման հարցման ընթացակարգի հրավերի 1-ին մասի՝

- 7.13 կետի 3-րդ ենթակետի համաձայն՝ Հանձնաժողովի քարտուղարը հայտերի բացման նիստի ավարտին հաջորդող աշխատանքային օրը՝ էլեկտրոնային փոստի միջոցով Հայաստանի Հանրապետության կառավարությանն առընթեր պետական եկամուտների կոմիտե (այսուհետ՝ կոմիտե) հարցում է ներկայացնում առաջին տեղ զբաղեցրած մասնակցի՝ հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ժամկետանց պարտավորությունների, ինչպես նաև սույն հրավերի 1-ին մասի 2.5 կետով նախատեսված՝ «ֆինանսական միջոցներ» որակավորման չափանիշի գնահատման համար սահմանված պայմանների առկայության վերաբերյալ՝ ներկայացնելով մասնակցի անվանումը և հարկ վճարողի հաշվառման համարը: Ընդ որում նույն

ենթակետում հարցումն ուղարկվում է Lena_Najaryan@taxservice.am էլեկտրոնային փոստի հասցեին նույն հրավերի 7-րդ հավելվածով նախատեսված ձևին համապատասխան՝ էլեկտրոնային նամակի պատճենները միաժամանակ ուղարկելով karine_sargsyan@taxservice.am, gor_mkrtchyan@taxservice.am և procurement@minfin.am էլեկտրոնային փոստի հասցեներին:

- 7.15 կետի համաձայն՝ կոմիտեն նույն հրավերի 1-ին մասի 7.13 կետի 3-րդ ենթակետով նախատեսված հարցումն ստանալու օրվանից երեք աշխատանքային օրվա ընթացքում էլեկտրոնային փոստի միջոցով պատվիրատուին տրամադրում է հարցման մասին սույն հրավերի 8-րդ հավելվածով նախատեսված ձևին համապատասխան տեղեկատվություն: Նույն կետով սահմանված ժամկետում կոմիտեից տեղեկատվության չստացման դեպքում մասնակցի ներկայացրած հայտարարությունները համարվում են իրականությանը համապատասխանող: Եթե կոմիտեի կողմից սահմանված ժամկետից ուշ ներկայացված տեղեկատվությամբ արձանագրվում է, որ առաջին տեղ զբաղեցրած մասնակիցը հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեցել է Օրենքով նախատեսված շեմը գերազանցող ժամկետանց պարտավորություններ կամ չի բավարարում սույն հրավերով «Ֆինանսական միջոցներ» որակավորման չափանիշի պահանջներին և պայմանագիրը կնքված չէ, ապա տվյալ մասնակցի հայտը մեժվում է: Եթե սահմանված ժամկետում տրամադրված տեղեկատվության արդյունքում մասնակցի ներկայացրած հայտարարությունը որակվում է իրականությանը չհամապատասխանող, ապա հայտերի գնահատման նիստում հանձնաժողովի որոշմամբ տվյալ մասնակցի հայտը մեժվում է՝ անկախ մասնակցի կողմից կոմիտեի տրամադրված տեղեկատվությունից տարբերվող տեղեկատվություն ներկայացվելու հանգամանքից: Նույն կետով նախատեսված որակավորման չափանիշի գնահատման ժամանակ հաշվի է առնվում նույն հրավերի 1-ին մասի 7.20 կետի 2-րդ ենթակետով նախատեսված ընթացակարգը:

«Գնումների մասին» ՀՀ օրենքի (այսուհետ նաև՝ Օրենք) 6-րդ հոդվածի 1-ին մասի 2-րդ կետի համաձայն՝ գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեն իրենց ներկայացրած գնային առաջարկի մինչև մեկ տոկոսը, բայց ոչ ավելի, քան հիսուն հազար Հայաստանի Հանրապետության դրամը գերազանցող ժամկետանց պարտավորություններ:

Բողոքներ քննող անձն արձանագրում է, որ.

- ՀՀ ԿԱ պետական եկամուտների կոմիտեի կողմից 17.09.2018թ. Հանձնաժողովին ներկայացրած եզրակացության համաձայն՝ «Վ ԵՎ Ա» ՍՊԸ-ի ընթացակարգին մասնակցելու նպատակով հայտը ներկայացնելու օրվա (12.09.2018թ.) դրությամբ հարկային մարմնի կողմից վերահսկվող եկամուտների գծով ժամկետանց պարտավորությունների գումարը կազմել է 53.370 ՀՀ դրամ:

- «Վ ԵՎ Ա» ՍՊԸ-ի հարկային մարմնի կողմից վերահսկվող եկամուտների գծով 22.000 ՀՀ դրամ գումարի չափով ժամկետանց պարտավորությունն առաջացել է «ՀՀ պաշտպանության ժամանակ զինծառայողների կյանքին կամ առողջությանը պատճառված վնասների հատուցման մասին» ՀՀ օրենքի համաձայն՝ վճարման ենթակա դրոշմանիշների վճարների գծով:

- ՀՀ ԿԱ ՊԵԿ նախագահի 2017թ. հուլիսի 19-ի թիվ 228-Ն հրամանի համաձայն՝ սահմանվել են վերահսկվող եկամուտների գծով պարտավորությունների վերաբերյալ տրվող տեղեկանքի ձևը, որտեղ՝ «ՀՀ պաշտպանության ժամանակ զինծառայողների կյանքին կամ առողջությանը պատճառված վնասների հատուցման մասին» ՀՀ օրենքի համաձայն՝ վճարման ենթակա դրոշմանիշների վճարը որպես հարկային մարմնի կողմից վերահսկվող եկամուտների գծով պարտավորություն, նախատեսված չէ:

- «Վ ԵՎ Ա» ՍՊԸ-ն հայտը ներակայացնելու օրը առաջնորդվել է Ընկերության «Հարկ վճարողի անձնական հաշվի քարտի» տվյալներում առկա տեղեկատվությամբ, որի համաձայն՝ «Վ ԵՎ Ա» ՍՊԸ-ի՝ հայտը ներակայացնելու օրվա (12.09.2018թ.) դրությամբ հարկային մարմինների կողմից վերահսկվող եկամուտների գծով պարտավորությունների գումարը կազմել է 31.369 ՀՀ դրամ, որը չի գերազանցում մասնակցի ներկայացրած գնային առաջարկի մեկ տոկոսը:

Բողոքներ քննող անձը գտնում է, որ «Վ ԵՎ Ա» ՍՊԸ-ի գնման գործընթացին հետագա մասնակցության դադարեցումը պայմանավորված է եղել Ընկերության իրազեկված չլինելու հանգամանքով, քանի որ Ընկերությունն արձանագրված հարկային պարտավորության առկայության վերաբերյալ տեղեկությունը կարող էր ձեռք բերել բացառապես Ընկերության՝ հարկ վճարողի անձնական հաշվի քարտի քաղվածքի տվյալներում առկա տեղեկատվությունից, որում արտացոլված չի եղել որևէ տեղեկատվություն դրոշմանիշային վճարի վերաբերյալ:

Բողոքներ քննող անձը գտնում է նաև, որ տվյալ դեպքում 22.000 ՀՀ դրամ գումարի չափով վճարման ենթակա դրոշմանիշների վճարի մասով պարտավորությունը չի կարող դիտարկվել «Վ ԵՎ Ա» ՍՊԸ-ի՝ հայտը ներակայացնելու օրվա (12.09.2018թ.) դրությամբ

հարկային մարմինների կողմից վերահսկվող եկամուտների գծով ժամկետանց պարտավորություն:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասի 1-ին կետի «բ» ենթակետով՝ ՀՀ գնումների հետ կապված բողոքներ քննող անձը

Ո Ր Ո Շ Ե Ց

1. «Վ ԵՎ Ա» ՍՊԸ-ի կողմից 27.09.2018թ ներկայացրած բողոքը բավարարել:

2. Պարտավորեցնել Երևանի քաղաքապետարանի կողմից Երևան քաղաքի Նոր Նորք վարչական շրջանի թիվ 117 մանկապարտեզի ջեռուցման համակարգի կառուցման աշխատանքի կատարման նպատակով հայտարարված գնման ընթացակարգի գնհատող հանձնաժողովին ընդունել՝ 20.09.2018թ. ժամը 11:00-ին կայացած նիստի թիվ 3 արձանագրության 1.1 կետով և 1.4 կետով ԵԲ-ԳՀԱՇՁԲ-18/49 ծածկագրով կայացված որոշումները դադարեցնելու մասին համապատասխան որոշում:

ՀՀ գնումների հետ կապված բողոքներ քննող անձի ընդունած որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

ՀՀ գնումների հետ կապված բողոքներ քննող անձի ընդունած որոշումն ուժի մեջ է մտնում այն տեղեկագրում հրապարակելուն հաջորդող օրը:

ՀՀ գնումների հետ կապված
բողոքներ քննող անձ՝



ԷՄԻԼ ՍԱՐԳՍՅԱՆ